



17. uagust 2012

UKA 2012/178

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiupparput:

Inuiaqatigiittut imigassamik atueriaaserput qanoq naleqqunnerusumik ileqquliunneqarsinnaanera pillugu apeqquteqaat aallaavigalugu oqallinnissamik siunnersuut (Inatsisartunut ilaasortat Siverth K. Heilmann aamma Knud Kristiansen, Atassut)

Tunngavilersuut:

Nunatsinni imigassaq ukiorpassuunngitsuni atuuppoq. Taamaattumillu oqaatigineqarsinnaavoq suli nunatsinni imigassaq sungiunniapilooripput.

Ilaqutariippassuit nunatsinni, angerlarsimaffippassuarni imigassamik atuinerup kingorna eqqissiviilliorfiusarput, pingaartumik sapaatit akunnerisa naanerini ullunilu akissarsiffinni. Tamanna nunaqqataasunut malunniutiinnarani qanigisaasunut, ilaquataasunullu annertuumik sunniuteqartarpoq. Minnerunngitsumillu meeqqat annerpaamik eqqorneqartarput.

Maannamut imigassaaq pillugu, tassangaluunniit atuisimanerup kingorna pissutaasunik misissuinerit qassimmita ingerlanneqarpat. Aammalu suliniuterpasuit mikinngitsut sumiiffippassuarni nunalu tamakkerlugu pitsaasorpasuit ingerlanneqartarput. Taamaakkaluartorli soorlu ilaatigut misinnartartoq kingumut alloriaqqittartugut, ilaatigut sapaatit akunnerisa naanerini ataatsikkut erngunnermi peratattoqaleraangat.

Apeqqutit amerlasuut ilaatigut tamatta pigisarunarpagut, ATASSUT-miillu apeqqutit arlallit pigisarpagut:

- Suliniuterpasuit pitsaasut, annertuullu kinguneqarnerat naammappa?
- Ilaqutariippassuit meerarpasuillu eqqorneqartarnerat qaqugu killilerniarparput?
- Meerarpasuit ilaatigullu meeraaqaat inoorlaat angerlarsimaffiup avataanut inissinneqartartut siunissaat ilerasunnanngila?
- Imigassartorsimallutik inuppasuit imminnut toquttartut apeqquterpassuillu qimallugit suliniutigineqartorpasuit iluatsinnginnerinut akissutaappat?
- Inuppasuit imigassamik ajornartorsiuteqarnermik pissutigalugu suliffimmiit soraarsitaasartut sunarpiaruna oqaluttuassartarigaat?
- Aappariippasuit avissaartarnerat imigassartorsimalluni eqqissiviilliornikkut, persutaasimanerluunniit pissutigalugu suut tunuliaqutaappat?

Suli apeqquterpassuugaluarpud. ATASSUT-miit isumaqarpugut piffissanngortoq inuiaqatigiittut immitsinnut qiviarnissarput piffissanngortoq, imigassamik atuinitta nalilersornissaanut. Killilersugaanngitsumik aammalu tikkuartuunnertaqanngitsumik inerititaqarfiusumillu oqallinnissarput pisariaqarpoq. ATASSUT-miit isumaqarpugut nunatsinni inuppasuarnut soq imigassamik ajornartorsiuteqarnermut tamarmik tunuliaquteqartut, tamarmik pissuteqartut arlaannik inuunermi nalaassimasamik immaqalu alloriaqqinnissamut qaangiineq sapilernermi.

ATASSUT-miit isumaqarpugut suli inuiaqatigiittut oqallittarnikkut ilikkagassaqtugut. Aammalu isumaqarpugut inuiaqatigiittut ileqqugut tassuuna qiviartariaqarivut, tassalu inuiaqatigiittut ileqqugut nuannaartorinarpallaanngitsut, ingutsisarnerit, sinngasarnerit, inoqatinullu sanngiinnerusunut malersuisarnerit, nakkarsaasarnerillu. ATASSUT-miimmi isumaqarpugut tamakku pissutaaqataalluinnartut imigassamik atuisarnitta oqaluttuassartaani.